

# Epeso wali Leta

## Pol wana Leleli

### Baaba Houwan

Yeisu wana sikal labulabumwa enaa baliman ana gewi tabam 32 i mowasi, he Pol iyoho Loma i miminaa dela. Saugena o leta ya i ginol, inoke Titiko i noahe i na i pek toekelesiya Epeso elal (4:21-22).

Panuwa Epeso iya panuwa bwabwatana labi Eisiya elana, ge wali bisnes hi gewi. Pol wana nopain etonina elana, baliman eton i miminaa Epeso elana ge i papaatena elal (Tuwalali 19).

Epeso eliyana gamagalau hi gewi nige Yudiya i oola, yaa enuna heliya Yudiya gamagaliliyau. Leta ya elana i pankitel boda labui o Keliso iyaka i tubwel hi tabwa boda maisena ekelesiya eliyana (2:15-16; 3:6). Pol i liwan nabi hauna Yehoba wana nuwatu ekelesiya kaiwena (3:10) ge hauna Yehoba wana mulolu eliyala. Ba kakanun eton i ginolil ekelesiya kaiwena. Ekelesiya i ola tuwan maisena ge Keliso i ola kaun (1:23; 4:15-16). Ekelesiya i ola limi ge Keliso i ola limi o ana ekahiyon (2:21-22). Ekelesiya i ola yova toalolon ge Keliso i ola lagona tau (5:25-27). I ola al Pol Epeso i ba pagasisel yawaliliya ana nawanawa ga ni ola kaiwena Keliso iyaka i tubwel hi ola tuwan maisena ge kaiwena heliya mwananal natunau.

---

**1** <sup>1</sup> Nau Pol, Yehoba wana nuwatu eliyana ya tabwa Keliso Yeisu wana apostolo. Leta ya ya leli ge ya patuna i nowa Yehoba wana gamagalau bolo ku minaa Epeso eliyamiu, komiu toabulilek hot Keliso Yeisu elana.<sup>a</sup>

<sup>2</sup> Ya awanun Yehoba Tamala ge wala Babala Yeisu Keliso nihi muloluagimiu ge wali nuwa laumwal atemiu ni pakalaopop.

### Keliso eliyana Yehoba Mulolu Gegewena iyaka I Pem Elala

<sup>3</sup> Yehoba ta tobalan, iya wala Babala Yeisu Keliso wana Yabowaine ge Tamana. Bosowaina hot ta tobalan, kaiwena Keliso eliyana mulolu

---

<sup>a</sup> 1:1 Tuw 18:19-21; 19:1

gegewena i neem labulabumwa iyaka i pem elala yayaluwala ana waisi kaiwena.<sup>b</sup> <sup>4</sup>He i ola hiwe. Mulaa abwe panayawi i ginol, iya iyaka i hilela wana gamagalau Keliso eliyana inoke matanaa ta bwabwalena ge nige ala woliwoli ni gagan.<sup>c</sup> <sup>5</sup>Sauga houhouwena i nunuwana-agila, inoke i nuwatu pahuwala te abwe Yeisu Keliso wana tuwalali eliyana ni awa natunagila. He iya totona wana yaliyaya ge wana nuwatu te i ginol ola o.<sup>d</sup> <sup>6</sup>Inoke iya ta tobalan wana mulolu kalakalaopopwina kaiwena, mulolu o iyaka i pem bwabwage Natuna nunuwanina hot eliyana.

<sup>7</sup>Yehoba wana mulolu i bwata hot, inoke Keliso wana yaomal eliyana Yehoba iyaka i pwamola pasikalila ge wala gegi i nuwayoho.<sup>e</sup> <sup>8</sup>Yehoba wana mulolu i ligin nabiyani eliyala alona ge siba gegewena ge aatena waiwaisana. <sup>9-10</sup>He wana nuwatu misusumena iyaka i pamasal eliyala kaiwena wana nuwatu i ola. Ana sauga hot elana wana nuwatu o bwaliga ni ginol, heiya bugul gegewena labulabumwa ge panayawiya ni palivaso ge Keliso ni kauni.<sup>f</sup>

<sup>11</sup>Ama Keliso eliyana Yehoba i ahema wana gamagalau, kaiwena sauga houhouwena i nuwatu ola. (He bugul gegewena Yehoba i ginolil i ola wana nuwatu.)<sup>g</sup> <sup>12</sup>Inoke ama bolo Keliso ana mel ha teli houwan, Yehoba i ahema wana gamagalau inoke Yehoba alana naha latahin ge naha tobalan. <sup>13</sup>Komiu al ge, wasa hot, heiya Yeisu Wasana Waiwaisana ami pwamwal kaiwena, ku hago, inoke iyaka ku abulilek Keliso elana ge ku tabwa wana gamagalau. Inoke Yehoba ana etotohi iyaka i teli eliyamiu i ola abaeuna, heiya Yayaluwa Bwabwalena i pewa eliyamiu i ola wana bateli. <sup>14</sup>Yayaluwa Bwabwalena iyaka ta ahe haba, inoke ta atena waisi gegewena bolo Yehoba i bateli kaiwela bwaliga abwe ta ahe al. He ta matamatan ana siga Yehoba ni sokalila hoti ge ni ahela avala ta mina. Iya alana ta latahin ge ta tobalan!<sup>h</sup>

### Pol I Awanun Yehoba elana Epeso kaiweliya

<sup>15</sup>Wami abulilek Babala Yeisu eliyana ge wami nunuwana Yehoba wana gamagalau elal wasana iyaka ya hago, <sup>16</sup>inoke toto o kaiwena nige ya veveyaho ba mulolu Yehoba elana kaiwemi, ge sauga gegewena ya awaawanun kaiwemi. <sup>17</sup>Ya awanun wala Babala Yeisu Keliso wana Yabowaine, iya Tamala Towasawasa, Yayaluwana ni pewa eliyamiu, inoke iya ni pasiba-agimiu ge Yehoba ni pamasal eliyamiu, yaka ana aatena ni bwata eliyamiu.<sup>i</sup> <sup>18</sup>Ya awanun Yehoba wami nuwatu ni pwamwananal, yaka nuku atena te iya i yogaagimiu ge bosowaina alomiu wami atimatuwa nuku matamatan wasawasa bwabwatana toto Yehoba abwe ni pem kila wana gamagalau elala. <sup>19</sup>I ola al nuku atena Yehoba wana gasisi i bwata nabi iyoho i tuwatuwalali kila toabulilek elala. He gasisi maisena o eliyana!<sup>j</sup>

<sup>b</sup> 1:3 Epe 2:6   <sup>c</sup> 1:4 Diyo 15:16   <sup>d</sup> 1:5 Diyo 1:12   <sup>e</sup> 1:7 Epe 2:7; Kols 1:14

<sup>f</sup> 1:9-10 Loma 16:25; Kols 1:16,20   <sup>g</sup> 1:11 Loma 8:28-29   <sup>h</sup> 1:14 2Kol 1:22

<sup>i</sup> 1:17 Kols 1:9   <sup>j</sup> 1:19 Kols 1:11

<sup>20</sup>heiya te Yehoba Keliso i palutem yaomala, ge i teliya nimana labena awonaa labulabumwa.<sup>k</sup> <sup>21</sup>Inoke tohouwa gegewel, gasisi ona gegewel, aneloseyau gegewel, tologugui gegewel, ge alan gegewena bolo hi gan sauga ya ge nihi gan sauga i nenem, Keliso iya i bwata lakel. <sup>22</sup>Yehoba Keliso i teli bugul gegewena ni logugui-agil nihi minaa aena gabulanaa, ge i teli ekelesiya ana bwalibwaligena ni kauni.<sup>l</sup> <sup>23</sup>He ekelesiya heiya Keliso tuwana, ge Keliso ekelesiya i paolaolaek ge ana waisi gegewena i pakalaopopwi.<sup>m</sup>

### Keliso eliyana Yehoba Yawal Vavaluna I Pem

**2** <sup>1</sup>Valila wami awatautau ge wami gegi kaiwena yayaluwamiu iyaka i aliga.<sup>n</sup> <sup>2</sup>Saugena o ku nanawaa panayawi ana nuwatu gogogouina elana, ge yayaluwa bibikel wali tohouwa Seitani wana kamwasa ku toulil. Iya nige ta kikite, yaa gamagalau bolo nige Yehoba hi aawatauwan i logugui-agil.<sup>o</sup> <sup>3</sup>Valila kila gegewela ta miminaa gamagalau bolo o ali boda elana, inoke tuwala yawalina ta toulil ge pagan bolo tuwala ge wala nuwatu nuwana ta awaawaginol. Sauga kila iyoho ta miola o, bosowaina te Yehoba alona wana huga avalau ge gamagalau gegewel ni lahela.<sup>p</sup>

<sup>4-5</sup>Kila wala awatautau kaiwena yayaluwala iyaka i aliga. Yaa Yehoba atilomwan i kalaopopwi, ge wana nunuwana eliyala i bwata hot, inoke avala Keliso yawal vavaluna i pem. He Yehoba wana mulolu bwagabwaga eliyana te mwal ku pwawa.<sup>q</sup> <sup>6</sup>Kila ta minaa Keliso Yeisu eliyana, inoke avala Keliso Yehoba i palutila yaomala, ge i telela avala Keliso ta minaa abamisiyo wawasana elana labulabumwa.<sup>r</sup> <sup>7</sup>Inoke kila ta tabwa abagagayawa sauga i nenem ana gamagalau kaiweliya ge nihi atena Yehoba wana mulolu i bwata nabi hot, kaiwena Keliso Yeisu eliyana i nunuwana-agila. <sup>8</sup>Sauga ku abulilek, Yehoba wana mulolu bwagabwaga heiya te eliyana ge mwal ku pwawa. Nige wami logasisi enona i oola, yaa Yehoba wana pewa bwabwage. <sup>9</sup>Nige wami tuwalali molana i oola, he nige bosowaina komiu etegana ni ba hanaha.<sup>s</sup> <sup>10</sup>Keliso Yeisu eliyana Yehoba i ginolila ta tabwa ginol vavaluna, nuwana te pagan waiwaisana ta ginolil, pagan waiwaisana o i lovivina-an nonowe tage eliyana ta nanawaa.<sup>t</sup>

### Keliso I Tubwela Ta Tabwa Boda Maisena

<sup>11</sup>Komiu hi abimiu nige Yudiya gamagaliliyau i oola. He Yudiya hi ba lowagimiu hi ba, “Komiu nige gotomwa yoho+ paganina ku aahe i oola ama iyaka ha ahe, he komiu nige Yehoba wana gamagalau i oola, ama ya te Yehoba wana gamagalau.” (Yaa pagan o gamagalau totoliya hi ginol, ge ana nuwatu i noek ya te tuwan ana labi elana.) He nuku nuwahikan

<sup>k</sup> 1:20 Same 110:1; 2Kol 13:4; Kols 2:12; 1:16; 2:10 <sup>l</sup> 1:22 Same 8:6 <sup>m</sup> 1:23 Epe 4:10,15; Loma 12:5; Kols 1:18 <sup>n</sup> 2:1-5 Kols 1:21; 2:13 <sup>o</sup> 2:2 Kols 3:7; Tai 3:3 <sup>p</sup> 2:3 Kols 3:6 <sup>q</sup> 2:4-5 Loma 6:13 <sup>r</sup> 2:6 Kols 2:12 <sup>s</sup> 2:9 1Kol 1:29-31; 2Tim 1:9 <sup>t</sup> 2:10 Tai 2:14

te valila ga ku miola. <sup>12</sup>Saugena o ami bwaga i yapu Keliso elana. Komiu ku ola bwabwali, nige alamiu i gagan boda Isileli Yehoba wana gamagalau elal, ge bateli+ bolo Yehoba alonau ge Isileli hi ginol, komiu nige kaiwemiu i oola. Wami minamina panayawiya, nige waisi etega i gagan kaiwemiu ge tage alomiu wami atimatuwa nuku matamatan waisi o kaiwena, ge nige Yehoba ana aatena i gagan eliyamiu.<sup>u</sup> <sup>13</sup>Yaa sauga ya Keliso Yesu eliyana, komiu valila ami bwaga yayapona Keliso saliyana iyaka i ahemiu ge ku mikelaubwa Yehoba elana.<sup>v</sup>

<sup>14</sup>Keliso iya atela i palaumwal inoke avalau ge avalau ta mibubun. Valila ama Yudiya ge komiu bolo nige Yudiya i oola ta pihigelgel-agila, inoke pihigelgel o i ola gana boda labui i walela. Yaa Keliso iya tuwana eliyana gana o i leke yoho, inoke boda labui i teli pamaisena ta tabwa boda maisena.<sup>w</sup> <sup>15</sup>Yudiya wama Logugui loguguina i gewi, yaa Keliso Logugui o iyaka i pwamowasi. I ginol ola o inoke boda labui i teli pamaisena, yaka boda vavaluna maisena i ginol ge ta mibubun.<sup>x</sup> <sup>16</sup>Keliso wana yaomal kolos eliyana boda labui wala pihigelgel i pwamowasi, i tubwela ta ola tuwan maisena ge i ahela ta sikal Yehoba elana.<sup>y</sup> <sup>17</sup>Inoke i nem ge mibubun wasana i papaatena-an, komiu eliyamiu bolo valila ami bwaga i yapu Yehoba elana, ge ama eliyama bolo ha mikelaubwa Yehoba elana.<sup>z</sup> <sup>18</sup>He iyaka ta mibubun, kaiwena Keliso eliyana kilau boda labui wala sapu i gan ge bosowaila Yayaluwa Bwabwalena wana labe eliyana ta nem Tamala elana.

<sup>19</sup>Inoke sauga ya komiu nige al ku oola bwabwali ge tovinvin, yaa alomiyau ge Yehoba wana gamagalau komiu towoho, komiu Yehoba ana un gamagaliliyau.<sup>a</sup> <sup>20</sup>Komiu al ge limi toto Yehoba i tal ana ginol enuna. Ama apostolowau alomeyau ge palopitau ha ola limi ana wauwau, ge Keliso Yesu iya limi o ana ekahiyana kona eliyana.<sup>b</sup> <sup>21</sup>Limi ana ginol gegewena hi tubwi Keliso eliyana inoke limi i bwatabwata ge i tabwa limi bwabwalena Babala elana.<sup>c</sup> <sup>22</sup>Komiu ku minaa Keliso eliyana, inoke Yehoba komiu alomiyau ge wana gamagalau gegewel i tubwemiu toyawe ku tabwa Yehoba alona ge Yayaluwana wali abamina.<sup>d</sup>

### Pol I Tuwalali Bolo Nige Yudiya I Oola kaiweliya

**3** <sup>1</sup>Yehoba i ginol ola o kaiwemiu, inoke toto o kaiwena ya awaawanun kaiwemiu. He nau Pol iyahe dela kaiwena Keliso Yesu wana tuwalali ya ginol komiu bolo nige Yudiya i oola kaiwemiu.<sup>e</sup> <sup>2</sup>Tabam iyaka wasau ku hago te Yehoba o mulolu i pem ge na tuwalali kaiwemiu.<sup>f</sup> <sup>3</sup>O mulolu toto i pem heiya te wana nuwatu misusumena

<sup>u</sup> 2:12 Kols 1:21; Loma 9:4    <sup>v</sup> 2:13 Kols 1:20    <sup>w</sup> 2:14 1Kol 12:13    <sup>x</sup> 2:15 Kols 2:14  
<sup>y</sup> 2:16 Sak 9:10; Kols 1:20,22    <sup>z</sup> 2:17 Ais 57:19    <sup>a</sup> 2:19 Epe 3:6    <sup>b</sup> 2:20 1Kol 3:11  
<sup>c</sup> 2:21 1Kol 3:16    <sup>d</sup> 2:22 1Pit 2:5    <sup>e</sup> 3:1 Pilp 1:7,13    <sup>f</sup> 3:2 Kols 1:25

i pankiteyau ge ya atena. (He iyaka kekeisi ya liwanan haba Yehoba wana nuwatu misusumena bana.<sup>g</sup> <sup>4</sup>Inoke ebo hauna ya lelelian nuku vasili, he nuku kite tunahot Yehoba wana nuwatu misusumena toto i ginola Keliso eliyana, ya atena.) <sup>5</sup>Sauga houhouwena ana gamagalau Yehoba wana nuwatu misusumena nige hi aatena, yaa sauga ya Yayaluwa Bwabwalena wana gasisi eliyana Yehoba iyaka i pamasal ama wana apostolowau ge wana palopitau bwabwalel eliyama. <sup>6</sup>He Yehoba wana nuwatu misusumena o i ola hiwe. Komiu bolo nige Yudiya i oola, Wasa Waiwaisana ku abulilek-an inoke ama Yudiya alomeyau komiu Yehoba wana mulolu toto i lovivina-an ta ahe toyawe, alomeyau komiu ta ola tuwan maisena gabomwiliyau, ge Keliso Yeisu eliyana Yehoba wana bateli ta ahe toyawe.<sup>h</sup>

<sup>7</sup>Yehoba o mulolu i pem ya tabwa Wasa Waiwaisana o ana totuwalali. Ge wana gasisi i pem eliyau ge eliyana wana tuwalali ya awaawaginol.<sup>i</sup> <sup>8</sup>Bwagana nau Yehoba wana gamagalau gegewel wali tokekeisisi, he Yehoba o mulolu i pem te waisi limwalimwanina toto ta pwawaa Keliso eliyana, wasana waiwaisana na papaatena-an bolo nige Yudiya i oola eliyamiu.<sup>j</sup> <sup>9</sup>Yehoba no tuwalali i pem hauna wana nuwatu misusumena ge nuwana ni ginol na pwamwananal gamagalau gegewel elal. He Yehoba, iya bugul gegewel ali Toginol, wana nuwatu o i sume sauga houhouwena eliyana. <sup>10</sup>Yehoba nuwana te sauga ya ekelesiya eliyana tohouwa gegewel ge gasisi ona gegewel labulabumwa, iya wana siba yayawewa nihi atena. <sup>11</sup>He sauga houhouwena hot Yehoba i nuwatu ni ginol ola o, inoke sauga ya Keliso Yeisu wala Babala wana tuwalali eliyana iyaka i ginol haba. <sup>12</sup>Ge kila ta minaa Keliso eliyana ge iya ta abulilek-an, inoke nige ta lolovakun te ta nok Yehoba manininaa alola ge wala atimatuwa.<sup>k</sup> <sup>13</sup>Inoke na baewa eliyamiu, bahi nuwamiu ni nanak ge yayaluwamiu ni pwepweyata kaiwena nau lomwan ya pwawa kaiwemi. Nau no lomwan enona te komiu waisi ku pwawa, inoke nuku yaliyaya-an.

### **Pol I Awanun Yehoba elana Epeso Keliso wana Nunuwana ana Bwata Nihi Atena**

<sup>14</sup>Yehoba i ginol ola o kaiwemi, inoke ya loepwakokuwa Tamala manininaa, <sup>15</sup>iya un gegewel labulabumwa ge panayawiya ali topapamasal. <sup>16</sup>Tamala bugul waiwaisal hi gewi i kalaopopwi nuwana ni pewa eliyamiu, inoke ya awanun Yayaluwa Bwabwalena wana tuwalali eliyana yayaluwamiu ni pagasisi, <sup>17</sup>ge wami abulilek kaiwena Keliso ni holaviya atemiwa. Ya awanun ewahilimiu ni lau nunuwana paganina eliyana ge yawalimiu ni matuwa, ni ola ebwakil ewahilina i lau ge bilibili

---

<sup>g</sup> 3:3 Epe 1:9-10; Kols 1:26    <sup>h</sup> 3:6 Epe 2:13,16-19    <sup>i</sup> 3:7 Kols 1:25    <sup>j</sup> 3:8 1Kol 15:9-10  
<sup>k</sup> 3:12 Diyo 14:6; Loma 5:2

i kukuhkan.<sup>l</sup> <sup>18</sup>Ya awanun alomiyau ge Yehoba wana gamagalau gegewel bosowaimiu Keliso wana nunuwana ana manamana, ana yapu, ana miha, ge ana limwan nuku atena. <sup>19</sup>He Keliso wana nunuwana ana bwata kila gamagalau nige bosowaina ta atena, yaa ya awanun wana nunuwana o nuku atena bubun ge amnana nuku anbose. Inoke Yehoba, iya waisi gegewena i kalaopopwi, ni minaa eliyamiu ge ni pakalaopop-agimiu.

<sup>20</sup>Yehoba wana gasisi iyoho i tuwatuwalali eliyala, inoke hauna toto ta awanuni o ebo hauna toto ta nuwatuan, he iya bosowaina ni ginol lake.

<sup>21</sup>Inoke kilau bolo ta minaa ekelesiya gamwanaa ge Keliso Yeisu eliyana, heyang ge heyang Yehoba ta awa wasawasa-an, sauga gegewena nige ni momowasi. Ibwe. I ola.

### Ta Tubwi Pamaisenana Ta Ola Tuwan Maisena

**4** <sup>1</sup>Nau ya minaa dela kaiwena ya tuwalali Babala kaiwena, inoke ya ba pagasisi eliyamiu yawalimiu ana minamina ni ola toto Yehoba wana nuwatu ge i yogaagimiu.<sup>m</sup> <sup>2</sup>Sauga gegewena nuku hanalau ge wami pagan ni meimei. Bahi etimwawa nuku huhuga, yaa ginebi wami nunuwana alomiyau wali ginol eliyamiu nuku palahikan.<sup>n</sup> <sup>3</sup>Yayaluwa Bwabwalena i pamibubun-agila, ge mibubun o i tubwela ta tabwa boda maisena. Inoke nuku logasisi ge mipamaisenana o paganina bahi ni momowasi.<sup>o</sup> <sup>4</sup>Gegewela ta tubwi ta ola tuwan maisena, ge Yayaluwa Bwabwalena toto ta ahe iyai te maisena. I ola al alola wala atimatuwa gegewela waisi maisena ya te kaiwena ta matamatan, toto Yehoba i lovivina-an kaiwela ge i yogaagila. <sup>5</sup>Wala Babala iyai te maisena, gegewela wala abulilek iyai te maisena, ge ala babitaiso iyai te maisena. <sup>6</sup>Wala Yabowaine iyai te maisena, iya kila gegewela Tamala. Iya gamagalau gegewel i logugui-agil, iya i tuwalali gegewel eliyalil, ge i minaa gegewel gamwaliyaa.<sup>p</sup>

<sup>7</sup>Kila maisena ge maisena Keliso ala mulolu i guyauan elala, i pem i ola iya wana nuwatu.<sup>q</sup> <sup>8</sup>He i ola Buki Bwabwalena ana baaba, i ba, “Sauga i na i ha natiya aban mihahaina hot elana, he alonau ge bolo iyaka i pakokovel ge i yowanil, ge gamagalau ali mulolu i guyauan elal.”<sup>r</sup> <sup>9</sup>(He baaba toto i ba, “i na i ha” i pankitela te houwan ga i nem i lau paiya hot panayawi elana.<sup>s</sup> <sup>10</sup>Toto i nem i lau, gamagalina maisena te i na i ha natiya. Nige tage i na i ha ya te labulabumwa, yaa i hek al ge i miha natiya hot, inoke bugul gegewel ni yabom ge ni pakalaopopwi.) <sup>11</sup>Inoke iya gamagalau ali mulolu i guyauan elal i ola hiwe. Enuna ali gabom i pek hi tabwa apostolowau, enuna palopitau, enuna Wasa Waiwaisana ana towasa, ge enuna gamagalau ali tomatahikan ge ali topanpankiti.<sup>t</sup>

<sup>l</sup> 3:17 Diyo 14:23; Kols 1:23; 2:7    <sup>m</sup> 4:1 Kols 1:10    <sup>n</sup> 4:2 Kols 3:12-13    <sup>o</sup> 4:3 Kols 3:14-15

<sup>p</sup> 4:6 1Kol 12:6    <sup>q</sup> 4:7 Loma 12:3,6    <sup>r</sup> 4:8 Same 68:18    <sup>s</sup> 4:9 Diyo 3:13

<sup>t</sup> 4:11 1Kol 12:28

<sup>12</sup>Gamagalau ali gabom i pek i ola o inoke Yehoba wana gamagalau ni lovivina-agil tuwalali waiwaisal nihi ginolil, yaka ekelesiya, iya Keliso tuwana, ni bwatabwata ge ni gagasisi. <sup>13</sup>He ana abapwamowasi ta ola boda maisena hot kaiwena Yehoba Natuna ta abulilek-an ge ta atena bubun, ta ola gamagalau matumatuwal, ge wala pagan ni olaolaek te pagan toto Keliso i kalaopopwi.<sup>u</sup>

<sup>14</sup>He yaka abwe nige al ta oola wawayau, nige al ta oola waga toto bagol i tagapwapwati, ge nige al bosowaina gamagalau sisibal wali panpankiti ni yu pwapwat-agila ni ola mana. He heliya kakawi ana kamwasa i gewi hi ginolil ge eliyana gamagalau hi pagegel. <sup>15</sup>Yaa kila bahi ta oolak panpankiti o elana, yaa alola wala nunuwana ta baaba tunahot, inoke ta siun ta gasisi ge avala Keliso ta tubwi hot, iya ekelesiya kaununa.<sup>v</sup> <sup>16</sup>Iya tuwan bwalibwaligena i logugui-an, inoke gabomwina tomaha ge tomaha hi tubwi pamaisena. Gabom maisena ge maisena totona wana tuwalali i awaawaginol, inoke tuwan bwalibwaligena i siusun ge i gagasisiek nunuwana paganina eliyana.

#### **Yawalimiu ana Nawanawa Ni Ola Komiu Mwananal Natunau**

<sup>17</sup>Babala alana elana ya ba pagasisi eliyamiu i ola hiwe. Bahi al wami minamina ni oola gamagalau bolo nige Yehoba hi aatena. Heliya wali nuwatu gegewena nige enona i gagan,<sup>w</sup> <sup>18</sup>ge ateliya i gogou. Nige wali aatena hot i gagan ge ateliya i gasisi i ola pat, inoke heliya nige alaliya i gagan yawal toto i neem Yehoba elana. <sup>19</sup>Nige al wali ginol hi pupuluwawi-an, yaa hi talamwagil ginol nanakina elana ge pagan pulupuluwawena hi ginoginol pwananik ya.

<sup>20</sup>Yaa komiu wami aatena Keliso kaiwena nige i oola to. <sup>21</sup>He Keliso wasana iyaka ku hago haba, ge baaba tutunahotina toto Yeisu eliyana komiu ana tototoulil iyaka hi pankitemiu. <sup>22</sup>Inoke yawalimiu bebeyanana toto valila ana pagan elana ku miminaa, nuku aliyoho, kaiwena yawal o amnanina i nunul pagegemiu inoke i apapanak-agimiu.<sup>x</sup> <sup>23</sup>Atemiu ge wami nuwatu ni valaluna,<sup>y</sup> <sup>24</sup>ge yawalimiu valaluna nuku galoi, yawal o paganina i ola Yehoba wana pagan, i sapu ge i bwabwalena hot.<sup>z</sup>

<sup>25</sup>Inoke besemiu lokalokakawi! Komiu maisena ge maisena ni baaba tunahot wana pan toabulilek elana, kaiwena kila gegewela tuwan maisena gabomwina ona.<sup>a</sup> <sup>26</sup>Ebo nuku huga, bahi wami huga ni kakalivaimiu ge gegi nuku giginol. Ge bahi wami huga ana sauga ni yayapu ni nana sabwelu ni lolobek,<sup>b</sup> <sup>27</sup>ge bahi Seitani wana hawawal etega nuku pepepe. <sup>28</sup>Gamagal toto i kakaoma bahi ni kakaoma al, yaa

<sup>u</sup> 4:13 Kols 1:28    <sup>v</sup> 4:15-16 Kols 1:18; 2:19    <sup>w</sup> 4:17 1Pit 1:14; Loma 1:21

<sup>x</sup> 4:22 Loma 8:13; Kols 3:9    <sup>y</sup> 4:23 Loma 12:2    <sup>z</sup> 4:24 Aba 1:26; Kols 3:10

<sup>a</sup> 4:25 Kols 3:8-9; Sak 8:16    <sup>b</sup> 4:26 Same 4:4; Yem 1:19-20

nimana ni patuwalali tuwalali waiwaisana ni ginol. Inoke wana bugul ni gewi ni pwawal ge bosowaina togulagula ni label.

<sup>29</sup>Bahi baaba nanakina nuku babaunan, yaa baaba waiwaisana toto bosowaina gamagalau bolo ali pulowan gaganil ni label ge nihi gasisi te nuku baunan. Inoke gamagalau bolo hi lalaegan, wali waisi nihi pwawaa to wami baaba eliyana.<sup>c</sup> <sup>30</sup>Bahi Yehoba Yayaluwana Bwabwalena nuwana nuku apanak, iya Yehoba wana euna eliyamiu i pamasal komiu iya wana gamagalau, inoke ku atena bwaliga abwe ni sokalimiu hoti.<sup>d</sup> <sup>31</sup>Atielolol amnanina gegewena nuku ahek yoho eliyamiu, alona ge huga. Bahi anamiu ni eelolol alomiyau elal ge bahi nuku babaa panapanak-agil. Bahi pihigelgel paganina ni gagan eliyamiu.<sup>e</sup> <sup>32</sup>Yaa wami pagan ni meimei alomiyau elal ge nuku atilomwan-agil. Alomiyau wali gegi eliyamiu nuku nuwayoho, ni ola Keliso eliyana Yehoba wami gegi iyaka i nuwayoho.<sup>f</sup>

**5** <sup>1</sup>Komiu Yehoba natunau nunuwanil, inoke nuku labose nuku ola iya.<sup>g</sup> <sup>2</sup>Nunuwana paganina eliyana nuku nanawaa, ni ola te Keliso i nuuwana-agila. He iya yawalina i talamwan kila kaiwela i ola powon bwalena waiwaisana toto Yehoba i yaliyaya-an.<sup>h</sup>

<sup>3</sup>Neganega paganina ge pagan pulupuluwawena, ge tomemek paganina, bahi kekeisi etega ni gagan eliyamiu. Pagan bolo ona o komiu Yehoba wana gamagalau bwabwalel nige bosowaimiu i oola. <sup>4</sup>I ola al, bahi ba sigasiga, bahi ba bwagabwaga hot, bahi neganega talawasena nuku babaunan, kaiwena nige i wawaisa eliyamiu. He ba mulolu Yehoba elana te nuku baunan. <sup>5</sup>Nuwamiu ni sapu te bolo neganega paganina ge pagan pulupuluwawena hi awaawaginol, ge bolo hi tomemek nige abaliya ni gagan Keliso ge Yehoba wali abaloguguiya. (He tomemek paganina i ola te ta kukululek yabowaine kakakawena elana.)<sup>i</sup> <sup>6</sup>Inoke bahi gamagal etega wana ba kakakawi eliyana nuwamiu ni liliwan ahe. He pagan bolo ona o kaiweliya Yehoba wana huga i nenem gamagalau bolo anana nige hi hahago eliyalil.<sup>j</sup> <sup>7</sup>Inoke bahi alomiyau ge gamagalau ololal o nuku lolopapalagito.

<sup>8</sup>Valila ku minaa gogouwa, yaa sauga ya Babala eliyana ku minaa mwananala. Inoke yawalimiu ana nawanawa ni ola komiu mwananal natunau,<sup>k</sup> <sup>9-10</sup>ge nuku loyaan hauna toto Babala i yaliyaya-an nuku atena. Kaiwena mwananal enowana heiya pagan waiwaisana, pagan sasapona ge ba tunahot. <sup>11</sup>Bahi nuku nonoek gogou paganina ana ginol elal, kaiwena nige enona i gagan, yaa nuku teli pamasalil mwananala ge gamagalau nihi atena gegi to. <sup>12</sup>(He toto gamagalau hi ginol sume nige

<sup>c</sup> 4:29 Kols 4:6    <sup>d</sup> 4:30 Ais 63:10; 1Tes 5:19; Epe 1:13-14    <sup>e</sup> 4:31 Kols 3:8

<sup>f</sup> 4:32 Mat 6:14; 18:22-35; Kols 3:12-13    <sup>g</sup> 5:1 Mat 5:48    <sup>h</sup> 5:2 Hib 10:10; Tota 29:18

<sup>i</sup> 5:5 1Kol 6:9-10; Kols 3:5    <sup>j</sup> 5:6 Kols 2:4,8; Loma 1:18    <sup>k</sup> 5:8 Epe 2:13; Kols 1:13; 1Pit 2:9; Diyo 12:36



bosowaiu na gotalisi-an, ana baaba ya puluwawi-an.)<sup>13</sup> Bugul gegewel bolo ta teli pamasalil mwananala, yaka gamwaliya hot ta kite bubun,<sup>l</sup> <sup>14</sup>kaiwena mwananal te bugul gegewena i teli tagilagil ge ta kite bubun. Heiya te kaiwena wala baaba etega i ba:

Owa tokenu, u lut,  
u lutem yaomala,

inoke Keliso mwananalina ni yanewa.<sup>m</sup>

<sup>15</sup>He yawalimiu ana nawanawa nuku matahikan bubun. Nuku ola bolo tonuwasapu, bahi nuku oola bolo nige nuwaliya i sasapu.<sup>n</sup> <sup>16</sup>Bahi wami sauga waiwaisana etega nuku hahanavenu-an, kaiwena sauga toto ya nak ana awaawaginol iyaka i gasisi. <sup>17</sup>Bahi nuku sigasiga, yaa Babala wana nuwatu kaiwemi nuku atena bubun.

<sup>18</sup>Bahi wewel gasigasisena nuku im kokona-an, eba ni apapanak-agimiu. Yaa Yayaluwa Bwabwalena nuku kalaopopwi.<sup>o</sup> <sup>19</sup>Same, wona tapwalolo ge wona bolo Yayaluwa Bwabwalena wana pewa ali baaba nuku baubaunan alomiyau elal. Awamiwa ge atemiwa al ge nuku wona tobal Babala elana,<sup>p</sup> <sup>20</sup>ge wala Babala Yesu Keliso alana elana, sauga gegewena nuku ba mulolu Yehoba Tamala elana bugul gegewena kaiweliya.<sup>q</sup>

### Toalolon Meluyowau ge Melubolau Baliya

<sup>21</sup>Alomiyau wali logugui nuku henapuan Keliso ana awatauwan kaiwena.<sup>r</sup>

<sup>22</sup>Komiu toalolon meluyowau, lagomiyau wali logugui nuku henapuan ni ola Babala wana logugui ku henapuan.<sup>s</sup> <sup>23</sup>Kaiwena tau iya lagona kaununa i ola te Keliso iya ekelesiya kaununa. He ekelesiya iya Keliso tuwana, ge Keliso iya ekelesiya ana Topwamwal.<sup>t</sup> <sup>24</sup>Ekelesiya Keliso wana logugui i henapuan, he i ola al to toalolon meluyowau lagoliyau wali logugui nihi henapuan sauga gegewena.

<sup>25</sup>Komiu toalolon melubolau, lagomiyau nuku nunuwana-agil ni ola Keliso ekelesiya i nunuwana-an ge yawalina i talamwan kaiwena.<sup>u</sup> <sup>26</sup>Yawalina i talamwan nuwana toabulilek ni ul payanayana-agil wewel elana<sup>v</sup> ni ola Wasa Waiwaisana ana baaba. Keliso nuwana ekelesiya ni pwabwabwalena,<sup>w</sup> <sup>27</sup>ge ni pamilil matanaa ni ola ekelesiya toto ana awa waiwaisana hot, nige ana potpot, nige tuwana i lolobabanunu, ge nige nakina etega al, yaa i sapusapu ge nige wana gegi i gagan.<sup>x</sup> <sup>28</sup>Inoke i ola al, bolau lagoliyau nihi nunuwana-agil ni ola heliya tuwaliya gabomwina ona hi nunuwana-agil.

<sup>l</sup> 5:13 Diyo 3:20-21    <sup>m</sup> 5:14 Ais 26:19; Loma 13:11    <sup>n</sup> 5:15-16 Kols 4:5

<sup>o</sup> 5:18 Luke 21:34    <sup>p</sup> 5:19 Kols 3:16    <sup>q</sup> 5:20 Kols 3:17    <sup>r</sup> 5:21 1Pit 5:5    <sup>s</sup> 5:22 Kols 3:18; 1Pit 3:1    <sup>t</sup> 5:23 1Kol 11:3; Epe 1:22    <sup>u</sup> 5:25 Kols 3:19; 1Pit 3:7    <sup>v</sup> 5:26 He "wewel elana" ba kakanun etega babitaiso bana.    <sup>w</sup> 5:26 Tai 3:5    <sup>x</sup> 5:27 2Kol 11:2; Kols 1:22

Ebo tau lagona ni nunuwana-an, he i ola totona i nunuwana-an to. <sup>29</sup>He nige sauga etega gamagal etega totona tuwana i pipihigelgel-an. Yaa ni paan ge ni matahikan bubun, ni ola Keliso i ginol kila ekelesiya elala, <sup>30</sup>kaiwena kila iya tuwana gabomwina ona. <sup>31</sup>Buki Bwabwalena i ba, “Heiya kaiwena tau tamana ge hinana ni miluwagil ni na alona ge lagona nihi mipamaisena inoke ali toto labui nihi ola tuwan maisena.”<sup>y</sup> <sup>32</sup>Buki ya ana nuwatu i limwan hot. He nau ya liwan pwatanek Keliso alona ge ekelesiya elal.<sup>z</sup> <sup>33</sup>Yaa ana baaba i noewa al komiu eliyamiu. Inoke tau maisena ge maisena lagona ni nunuwana-an ni ola totona i nunuwana-an, ge yova lagona ni awatauwan.

### Wawayau Avaliyau Hinaliyau ge Tamaliyau Baliya

**6** <sup>1</sup>Komiu wawayau, hinamiyau ge tamamiyau awaliya nuku ab kaiwena komiu ku minaa Babala elana. He i sapu te nuku ginol ola o.<sup>a</sup> <sup>2</sup>Buki Bwabwalena i ba, “Hinam ge tamwam nu awatauwagil.” He logugui ya iya logugui houwan toto alona ge ana bateli,<sup>b</sup> <sup>3</sup>ge bateli o i ba, “inoke ni waisi eliyam ge yawalim ana minamina ni yapu panayawiya.”

<sup>4</sup>Komiu tamataman, bahi natumiyau nuku papahugahuga-agil, yaa nuku nubwel bubunil, nuku pahenapol ge nuku pankitel Babala kaiwena.<sup>c</sup>

### Totuwalali Loloyowanil ge wali Tonowakau Baliya

<sup>5</sup>Komiu totuwalali loloyowanil, alona wami awatauwan ge wami lovakun, ge alona wami atitalam, wami tonowakau panayawiya awaliya nuku ab ni ola te Keliso awana ku aab.<sup>d</sup> <sup>6</sup>Bahi tage ebo nihi kite hikagimiu ge abwe nuku tuwalali bubun, inoke nihi yaliyaya kaiwemiu. Yaa nuku tuwalali ni ola komiu Keliso wana totuwalali loloyowanil ge Yehoba wana nuwatu ku awaawaginol alona ge atemiu bwalibwaligena. <sup>7</sup>Ginebi ge wami yaliyaya nuku tuwalali, ni ola te ku tutuwalali Babala elana, nige gamagalau elal i oola. <sup>8</sup>Kaiwena ku atena Babala gamagal maisena ge maisena, bwagana iya totuwalali loloyowanina o ebo gamagal sokasokalina, wana tuwalali waiwaisana molana ni pek.<sup>e</sup>

<sup>9</sup>Komiu tonowakau, komiu al ge wami ginol ni waisi wami totuwalali loloyowanil elal. Bahi al nuku papalovakunil, kaiwena ku atena heliya ge komiu wami Tonowak Bwabwatana iyoho labulabumwa, ge iya matanaa gamagalau gegewel hi olaolaek.<sup>f</sup>

### Yehoba wana Elohaveyan Nuku Galoi ge Nuku Haveyan

<sup>10</sup>No baaba na pwamowasiya hiwe: komiu iyaka ku minek Babala elana, inoke wana gasisi bwabwatana ni pagasisi-agimiu. <sup>11</sup>Elohaveyan

<sup>y</sup> 5:31 Mat 19:5    <sup>z</sup> 5:32 Pan 19:7    <sup>a</sup> 6:1 Kols 3:20    <sup>b</sup> 6:2-3 Tota 20:12    <sup>c</sup> 6:4 Kols 3:21; Same 78:4; BaPa 22:6    <sup>d</sup> 6:5 Kols 3:22-23; Tai 2:9-10; 1Pit 2:18    <sup>e</sup> 6:8 2Kol 5:10; Kols 3:24-25    <sup>f</sup> 6:9 Kols 4:1; Loma 2:11

bolo Yehoba i pewa eliyamiu gegewena nuku galoi, inoke bosowaimiu nuku talmilil gagasisi ge bahi Seitani wana nuwatu ni kakakawemiu.<sup>g</sup> 12 Kila nige tage avalau ge wala pan gamagalau ta lohalohaveyan, yaa avalau yayaluwa bibikel bolo hi miminaa hawawala, avaliyau wali tohouwa ge wali gasisi ona, bolo panayawi gogogouina ya hi logugui-an.<sup>h</sup> 13 He elohaveyan bolo Yehoba i pewa gegewena nuku galoi, inoke sauga nanakina elana bosowaimiu nuku talmilil gagasisi haveyan elana, ge sauga haveyan nuku pwamowasi, komiu iyoho ya ku taltalmilil abamiwa. 14 He nuku talmilil ami galogaloi ni ola hiwe. Baaba tunahot ni ola ami wasikewa nuku gimwan bubun henuwanimiwa, ge pagan sasapona ni ola babagalimiu ana eteli kaus.<sup>i</sup> 15 He wami yaliyaya toto tage mibubun Wasana Waiwaisana nuku wasaan, ni ola aemiua ana.<sup>j</sup> 16 Sauga gegewena abulilek nuku ahe ni ola wami ligovan, ge eliyana Seitani wana gau tatauina nuku pal ge wana tau nuku pwabolu. 17 Yehoba wana pwamwal nuku ahe ni ola ami pepem gasigasisena,<sup>k</sup> ge Yehoba wana baaba nuku ahe ni ola haveyan kilepana toto Yayaluwa Bwabwalena i pewa.<sup>l</sup> 18 Ge sauga gegewena Yayaluwa Bwabwalena wana gasisi eliyana nuku awaawanun. He pulowan gegewel kaiweliya wami awanun nuku pek Yehoba elana ge nuku ba ni labemiu. Inoke nuku silawa ge bahi nuku babakuha awaawanun Yehoba wana gamagalau gegewel kaiweliya.<sup>m</sup> 19 He nau al ge nuku awanun kaiweu. Nuku awanun te sauga ebo na baaba, he Yehoba baaba ni pem inoke ateu ni matuwa ge Wasa Waiwaisana, iya Yehoba wana nuwatu toto i misumi ga, na ba tagilan.<sup>n</sup> 20 Yehoba i patunau Wasa Waiwaisana o ana towasa, ge toto o kaiwena nau iyahe dela. Inoke nuku awanun ateu ni matuwa Wasa Waiwaisana na wasaan ni ola o logugui.<sup>o</sup>

### Baaba Mowamowasena

21 Titiko, iya talila nunuwana ge totuwalali waiwaisana Babala kaiwena, wasau gegewena abwe ni baunan eliyamiu, inoke nuku atena no minamina ga i ola.<sup>p</sup> 22 Toto o kaiwena ya papatuna i nonowa eliyamiu inoke wama minamina wasana nuku atena ge ni paatimatuwa-agimiu.

23 Ya awanun Yehoba Tamala ge wala Babala Yesu Keliso komiu toabulilek atemiu nihi palaumwal, wami abulilek nihi pagasisi ge nihi labemiu alomiyau nuku nunuwana-agil. 24 Ya awanun Yehoba gamagalau gegewel bolo wala Babala Yesu Keliso ana nunuwana i mihot eliyalil, ni muloluagil.

<sup>g</sup> 6:11 Loma 13:12; 2Kol 10:4    <sup>h</sup> 6:12 1Pit 5:8-9    <sup>i</sup> 6:14 Ais 11:5; 59:17; 1Tes 5:8

<sup>j</sup> 6:15 Loma 10:15    <sup>k</sup> 6:17 "Pepem gasigasisena" he helmet bana.    <sup>l</sup> 6:17 Hib 4:12

<sup>m</sup> 6:18 Luke 18:1; Kols 4:2; 1Tes 5:17    <sup>n</sup> 6:19 Kols 4:3-4; 2Tes 3:1    <sup>o</sup> 6:20 2Kol 5:20;

Pilm 9    <sup>p</sup> 6:21 Tuw 20:4; Kols 4:7-8; 2Tim 4:12